

摘藻堂四庫全書薈要

集部

欽定四庫全書薈要

集部

東坡全集卷二十五

六

詳校官助教臣常循



欽定四庫全書薈要卷一萬四千八百五十七

集部

東坡全集卷二十五

宋 蘇軾 撰

詩八十七首

汲江煎茶


活火還須活火烹

唐人云茶須緩
火炙活火煎

自臨釣石取深清大

瓢貯月歸春甕小杓分江入夜鉸茶雨已翻煎處脚松
風忽作瀉時聲枯腸未易禁三盃坐數荒村長短更

予來僂耳得吠狗曰烏嘴甚猛而馴隨予遷合

浦過澄邁泗而濟路人皆驚戲為作此詩

烏喙本海獒幸我為之主食餘已瓠肥終不憂鼎俎晝
馴識賓客夜捍為門戶知我當北還掉尾喜欲舞跳踉
赴僮僕吐舌喘汗雨長橋不肯躡徑度清深浦拍浮似
鷺鴨登岸劇虓虎盜肉亦小疵鞭箠當貫汝再拜謝恩
厚天不遣言語何當寄家書黃耳定乃祖

澄邁驛通潮閣二首

倦客遙聞歸路遙眼明飛閣俯長橋貪看白鷺橫秋浦

不覺青林沒晚潮

餘生欲老海南村
帝遣巫陽招我魂
杳杳天低鶻沒處
青山一髮是中原

洞酌亭詩

并引

瓊山郡東衆泉鬻發然皆冽而不食
丁丑歲六月軾南遷過瓊始得雙泉之甘於城之東北隅以告其人自是
汲者常滿泉相去咫尺而異味
庚辰歲六月十七日遷於合浦復過之
太守承議郎陸公求泉上之亭名與詩

名之曰泂酌其詩曰

泂酌彼兩泉挹彼注茲一鉶之中有澠有淄以淪以烹
衆喊莫齊自江徂海浩然無私豈弟君子江海是儀既
味我泉亦嚙我詩

六月二十日夜渡海

參橫斗轉欲三更苦雨終風也解晴雲散月明誰點綴
天容海色本澄清空餘魯叟乘桴意粗識軒轅奏樂聲
九死南荒吾不恨茲游竒絕冠平生

自雷適廉宿於興廉村淨行院

荒涼海南北佛舍如雞棲忽此榕林中跨空飛拱榭當
門冽碧井洗我兩足泥高堂磨新甑洞戶分角圭倒床
便甘寢鼻息如虹霓僮僕不肯去我為半日稽晨登一
葉舟醉兀十里谿醒來知何處歸路老更迷

廉州龍眼質味殊絕可敵荔支

龍眼與荔支異出同父祖端如柑與橘未易相可否異
哉西海濱琪樹羅玄圃纍纍似桃李一流膏乳坐疑

星隕空又恐珠還浦圖經未嘗說玉食遠莫數獨使皴
皮生弄色暎瑯俎蠻荒非汝辱幸免妃子汙

合浦愈上人以詩名嶺外將訪道南嶽留詩壁
上云閒伴孤雲自在飛東坡居士過其精舍
戲和其韻

孤雲出岫豈求伴錫杖凌空自要飛為問庭松尚西指
不知老壯幾年歸

梅聖俞之客歐陽晦夫使工畫茅庵已居其中

一琴橫牀而已曹子方作詩四韻僕和之云
寂寞王子猷回船剡溪路迢遙戴安道雪夕誰與度倒
披王恭氅半掩袁安戶應調折絃琴自和撚鬚句

歐陽晦夫惠琴枕

中郎不眠仰看屋得此古椽圍尺竹輪囷濩落非笛材
剖作袖琴徽軫足流傳幾處到淵明卧枕綸巾酒新漉
孤鶯別鵠誰復聞鼻息齁齁自成曲

留別廉守

編萑以豈猪堊塗以塗之小餅如嚼月中有酥與飴懸
知合浦人長誦東坡詩好在真一酒為我醉宗資

餅筴詩

并引

庚辰八月二十八日劉幾仲餞飲東坡中觴聞筴簫聲
杳杳若在雲霄間抑揚往返粗中音節徐而察之則出
於雙餅水火相得自然吟嘯蓋食頃乃已坐客驚歎得
未曾有請作餅筴詩記之

孤松吟風細泠泠獨蠶長繅女媧筴陋哉石鼎逢彌明

丘蚓竅作蒼蠅聲
鉗中宮商自相賡
昭文無虧亦無成
東坡醉熟呼不醒
但云作勞吾耳鳴

歐陽晦夫遺接離琴枕戲作此詩謝之

攜兒過嶺今七年
晚塗更著黎衣冠
白頭穿林要藤帽
赤脚渡水須花縵
不愁故人驚絕倒
但使俚俗相恬安
見君合浦如夢寐
挽鬚握手俱汎瀾
妻縫接罹霧縠細
兒送琴枕冰徽寒
無絃且寄陶令意
倒載猶作山公看
我懷汝陰六一老
眉宇秀發如春巒
羽衣鶴氅古仙伯

岌岌兩柱扶霜紈至今畫像作此服凜如退之加渥丹
爾來前輩皆鬼錄我亦帶脫巾歆寬作詩頗似六一語
往往亦帶梅翁酸

次韻王鬱林

晚塗流落不堪言海上春泥手自翻漢使節空餘皓首
故侯瓜在有頽垣平生多難非天意此去殘年盡主恩
誤辱使君相收拭寧聞老鶴更乘軒

藤州江下夜起對月贈邵道士

江月照我心江水洗我肝端如徑寸珠墮此白玉盤我心本如此月滿江不滿起舞者誰歟莫作三人看嶠南瘴毒地有此江月寒乃知天壤間何人不清安床頭有白酒盞若白露溥獨醉還獨醒夜氣清漫漫仍呼邵道士取琴月下彈相將乘一葉夜下蒼梧灘

徐元用使君與其子端常邀僕與小兒過同游
東山浮金堂戲作此詩

昔與徐使君共賞錢塘春愛此小天竺時來中聖人松

如遷客老酒似使君醇繫舟藤城下弄月鐔江濱江月
夜夜好雲山朝朝新使君有令子真是石麒麟我子乃
散材有如木輪囷二老白接羅兩郎烏角巾醉卧松下
石扶歸江上津浮橋半沒水揭此碧鱗鱗

送鮮于都曹歸蜀灌口舊居

簫盡霜鬚照碧銅依然春雪在長松朝行屏浦催收芋
夜渡繩橋看伏龍莫歎倦游無駟馬要將老健敵千鍾
子雲三世惟身在為向西南說病容

送邵道士彥肅還都嶠

乞得紛紛擾擾身
結茆都嶠與仙鄰
少而寡慾顏常好
老不求名語益真
許邁有妻還學道
陶潛無酒亦從人
相隨十日還歸去
萬劫清遊結此因

書韓幹二馬

赤髯碧眼老鮮卑
回策如縈獨善騎
赭白紫騮俱絕世
馬中岳湛有妍姿

將至廣州用過韻寄邁迨二子

皇天遣出家臨老乃學道北歸為兒子破戒堪一笑披
雲見天眼回首失海潦蠻唱與黎歌餘音猶杳杳大兒
牧衆穉四歲守孤嶠次子病學醫三折乃粗曉小兒耕
且養得暇為書繞我亦因詩酒去道愈茫渺紛紛何時
定所至皆可老莫學柳儀曹詩書教氓獠亦莫事登陟
谿山有何好安居與我游閉戶淨灑掃

贈鄭清叟秀才

風濤戰扶胥海賊橫泥子胡為犯二怖博此一笑喜問

君奚所欲欲談仁義耳我才不逮人所有聊足已安能
相付予過聽君誤矣霜風掃瘴毒冬日稍清美年來萬
事足所欠惟一死澹欲兩無求滑淨空悲几

和孫叔靜兄弟李端叔唱和

病骨瘦欲折霜髯籥更疎喜聞新國政兼得故人書秉
燭真如夢傾盃不敢餘天涯老兄弟懷抱幾時攄

廣倅蕭大夫借前韻見贈復和答之

坐還粗勝虞早退不如踈垂死初聞道平生誤信書風

濤驚夜半疾病送災餘賴有蕭夫子幽懷得少攄

心閒詩自放筆老語翻疎贈我皆強韻知君得異書滔
滔沮叟是綽綽孟生餘一笑滄溟側應無憤可攄

王進叔所藏畫跋尾五首

徐熙杏花

江左風流王謝家盡攜書畫到天涯却因梅雨丹青暗
洗出徐熙落墨花

趙昌四季

芍藥

倚竹佳人翠袖長
天寒猶著薄羅裳
揚州近日紅千葉
自是風流時世粧

躑躅

楓林翠壁楚江邊
躑躅千層不忍看
開卷便知歸路近
劍南樵叟為施丹

寒菊

輕肌弱骨散幽葩
真是青裙兩髻丫
便有佳名配黃菊

應緣霜後苦無花

山茶

遊蜂掠盡粉絲黃
落蕊猶收蜜露香
待得春風幾枝在
年來殺菽有飛霜

和黃秀才鑒空閣

明月本自明無心
熟為境挂空如水
鑒寫此山河影我
觀大瀛海巨浸與
天永九州居其間
無異蛇盤鏡空水
兩無質相照但耿耿
妄云桂兔蟾俗說
皆可屏我游鑒

空閣缺月正淒冷黃子寒無衣對月句愈警借君方諸
淚一沐管城穎誰言小叢林清絕冠五嶺

韋偃牧馬圖

神工妙技帝所收江都曹韓逝莫留人間畫馬唯韋侯
當年為誰掃驂騑至今霜蹄踏長楸圉人困卧沙壠頭
沙苑茫茫疾藜秋風髮霧鬣寒颼颼龍種尚與駑胎游
長稽短豆豈我羞八鑿六轡非馬謀古來西山與東丘

題靈峰寺壁

靈峯山上寶陀寺白髮東坡又到來前世德雲今我是
依希猶記妙高臺

衆妙堂

廣州何道士

湛然無觀古真人我獨觀此衆妙門夫物芸芸各歸根
衆中得一道乃存道人晨起開東軒趺坐一醉扶桑暎
餘光照我玻璃盆倒射窻几清而溫欲收月魄餐日魂
我自日月誰使吞

題馮通直明月湖詩後

老衍清篇墨未枯
小馮新作語尤殊
呼兒淨洗涵星硯
為子賡歌墮月湖
聞道泮江空抱珥
年來合浦自還珠
請君多釀蓮花酒
準擬王喬下履鳧

南詔有西珥河即古泮柯江也河形

如月抱珥故名之西珥云

次韻鄭介夫二首

一落泥塗迹愈深
尺薪如桂米如金
長庚到曉空陪月
太歲今年合守心
相與齧羶持漢節
何妨振履出商音
孤雲倦鳥空來往
自要閒飛不作霖

一生憂患萃殘年心似驚蠶未易眠海上偶來期汗漫
葦間猶得見夤緣良醫自要經三折老將何妨敗兩甄
收取桑榆種梨棗祝君眉壽似增川

昔在九江與蘇伯固唱和其畧曰我夢扁舟浮
震澤雪浪橫江千頃白覺來滿眼是廬山倚
天無數開青壁蓋實夢也昨日又夢伯固手
持乳香嬰兒示余覺而思之蓋南華賜物也
豈復與伯固相見於此耶今得來書已在南

華相待數日矣感歎不已故先寄此詩

扁舟震澤定何時滿眼廬山覺又非
春草池塘惠連夢上林鴻鴈子卿歸
水香知是曹谿口眼淨同看古佛衣
不向南華結香火此生何處是真依

次韻韶守狄大夫見贈二首

華髮蕭蕭老遂良

唐河南地公即日遂良鬚髮盡白蓋編長沙時也

一身萍挂

海中央無錢種菜為家業有病安心是藥方
才疎正類孔文舉癡絕還同顧長康
萬里歸來空泣血七年供奉

殿西廊

通英閣在延和殿兩廊下

森森畫戟擁朱輪坐詠梁公覺有神白傅閒游空誦句

事見樂天吳郡詩石叙

拾遺窮老敢論親

事見子美贈秋明府詩

東海莫懷

一信春
疏受意西風幸免庾公塵為公過嶺傳新唱催發寒梅

次韻韶倅季通直二首

一篇瀧吏可書紳莫向長沮更問津老去常憂伴新鬼
歸來且喜是陳人曾陪令尹蒼髯古又見郎君白髮新

回首天涯一惆悵却登梅嶺望楓宸

青山祇在古城隅萬里歸來卜築初會見四山朝鶴駕

更看二李控鯨魚欲從抱朴傳家學應怪中郎得異書

待我丹成馭風去借君瓊佩與霞裾

僕昔為開封幕先公為赤令暇日相

與論內外丹且出其丹示僕今三十年而見若曲江同遊南華行山水間數日道舊感歎且歡我卜居于舒故

詩中皆及之

狄韶州煮蔓菁蘆服羹

我昔在田間寒庖有珍烹常支折脚鼎自煮花蔓菁中

年失此味想像如隔生誰知南嶽老解作東坡羹中有
蘆蕨根尚含曉露清勿語貴公子從渠醉羶腥

李伯時畫其弟亮功舊宅圖

樂天蚤退今安有摩詰長閒古亦無五畝自栽池上竹
十年空看輞川圖近聞陶令開三徑應許揚雄寄一區
晚歲與君同活計如雲鷺鴨散平湖

贈龍光長老

斫得龍光竹兩竿持歸嶺北萬人看竹中一滴曹溪水

漲起西江十八灘

贈嶺上老人

鶴骨霜髯心已灰
青松合抱手親栽
問翁大庾嶺頭住
曾見南遷幾個回

贈嶺上梅

梅花開盡雜花開
過盡行人君不來
不趁青梅嘗煮酒
要看細雨熟黃梅

予昔過嶺而南題詩龍泉鐘上今復過而北次

其韻

秋風卷黃落朝雨洗綠淨人貪歸路好節近中原正下
嶺獨徐行艱嶮未敢忘遙知叔孫子已致魯諸生

過嶺

暫著南冠不到頭却隨北鴈與歸休平生不作兔三窟
今古何殊貉一丘當日無人送臨賀至今有廟祀潮州
劍關西望七千里乘興真為玉局游

留題顯聖寺

渺渺疎林集晚鴉
孤村煙火梵王家
幽人自種千頭橘
遠客來尋百結花
浮石已乾霜後水
焦坑閒試雨前茶
祇疑歸夢西南去
翠竹江村繚白沙

予初謫嶺南過田氏水閣東南一峯豐下銳上
里人謂雞籠山予更名獨秀峯今復過之戲
留一絕

倚天巉絕玉浮屠
肯與彭郎作小姑
獨秀江南知有意
要三二別四三壺

乞數珠一首贈南禪湜老

從君覓數珠老境仗消遣未敢轉千佛且從千佛轉儒
生推變化乾策數大衍道士守玄牝龍虎看舒卷我老
安能為萬劫付一喘默坐閱塵界往來八十反區區我
所寄蹙縮蠶在蠶適從海上回蓬萊又清淺

鬱孤臺

再過虔州
和前韻

吾生如寄耳嶺海亦閒遊贛石三百里寒江尺五流楚
山微有霰越毒久無秋望斷嶺南嶠魂飛咤雪洲曉鐘

時出寺暮鼓各鳴樓歸路迷千嶂勞生閱百州不隨猿
鶴化甘作賈胡留祇有貂裘在猶堪買釣舟

虔守霍大夫監郡許朝奉見和此詩復次前韻

大邦安靜治小院得閒游贛水雨已漲廉泉春水流同
烹貢茗雪一洗瘴茅秋秋思生尊鱠寒衣待橘州揚雄
未有宅王粲且登樓老境無多日歸心夢幾州敢因逃
酒去端為和詩留舊篋藏新語清風自滿舟

贈虔州術士謝君

屬國新從海外歸君平且莫下簾帷前生恐是盧行者
後學過呼韓退之死後人傳戒定慧生時宿直斗牛箕
憑君為筭行年看便數生時到死時

虔州景德寺榮師湛然堂

卓然精明念不起兀然灰槁照不滅方定之時慧在定
定慧寂照非兩法妙湛總持不動尊默然真入不二門
語息則默非對語此話要將周易論諸方人人把雷電
不容細看真頭面欲知妙湛與總持更問江東三語掾

和陽行先

用營孤
臺韻

室空惟法喜心定有天游
摩詰元無病須洹不入流
苦嫌尋直枉坐待寸田秋
雖未麒麟閣已逃鸚鵡洲
酒醒風動竹夢斷月窺樓
衆謂元德秀自稱陽道州
拔葵終相魯辟穀會封留
用舍俱無礙飄然不繫舟

用數珠韻贈湜長老

嗣宗雖不言叔寶猶理遣
東坡但熟睡一夕一展轉
南遷昔虞翻却掃今馮衍
古佛既手提諸方皆席卷
當年

清隱老鶴瘦龜不喘和我彈丸詩百發亦百反耆年日
凋喪但有犢角蠻時來窺方丈共笑虎毛淺

和猶子遲贈孫志舉

軒裳大爐鞴陶冶一世人從衡落模範誰復甘饑貧可
憐方回癡初不疑嘉賓頗念懷祖黠瞋兒與兵姻失身
墮浩渺投老無涯垠回看十年舊誰似數子真孫郎表
獨立霜戟交重闔深居小汝覲豈問親與鄰進技皆秀
傑英氣推伯仁我從海外歸喜及崆峒春新年得異書

西郭有逸民

陽行先以登
真隱訣見借

小孫又過我歡老平生親清

詩五百言句句皆絕倫養火雖未伏要是丹砂銀我家
六男子朴學非時新詩詞各璀璨老語徒用諄願言敦
夙好永與竹林均六子豈可忘從我屢厄陳

南禪長老和詩不已故作六蟲篇答之

鳳凰覽德輝遠引不待遣鷓鴣戀庭宇倏忽來千轉那
將坐井蛙而比談天衍蠹魚著文字搗死猶遭卷老牛
疲耕作見月亦妄喘東坡方三問南禪已五反老人但

目擊侍者應足齒最後六蟲篇深寄恨語淺

明日南禪和詩不到故重賦數珠篇以督之二

首

未來不可招已過那容遣中間見在心一一風輪轉自
從一生二巧歷莫能衍不如袖手坐六用都懷卷風雷
生警效萬竅自號喘詩人思無邪孟子內自反大珠分
一月細綆合兩繭纒然挂禪床妙用夫豈淺

朝來取飯化乃是維摩遣金鋒雖未露半藏已曾轉說

有陋裴顏談無笑上行看經聊爾耳遮眼初不卷三咤
故自醒一呷何由喘請歸視故櫝靜夜珠當反安居三
十年古衲磨山繭持珠尚默坐豈是功用淺

用前韻再和霍大夫

文字先生飲

謂劉執中

江山清獻游典刑傳父老尊俎繼風

流度嶺逢梅雨還家指麥秋自慚鴻鴈侶爭集稻粱洲
野闊橫雙練城堅聳百樓行看鳳尾詔却下虎頭州君
意已吳越我行無去留歸途應食粥乞米使君舟

用前韻再和許朝奉

高門元世舊客路晚追遊清絕聞詩語疎通豈法流傳
家有衣鉢斷獄盡春秋邂逅陪車馬尋芳謝眺洲淒涼
望鄉國得句仲宣樓恨賦投湘水悲歌祀柳州何如五
字律相與一樽留更約登塵外歸時月滿舟

用前韻再和孫志舉

人衆者勝天天定亦勝人鄧通豈不富郭解安得貧驚
飛賀厦鷺走散入幕賓醉眠中山酒夢結南柯姻寵辱

能幾何悲歡浩無垠回視人間世了無一事真灑掃古
玉局香火通帝闈我室思無邪我堂德有鄰所至為鄉
里事賢友其仁之子富經術蔚如井火春蛭蠶楚南極
淑氣生此民唱高和自寡非我誰當親譬彼嶰谷竹剪
裁侍伶倫俗學奸可鄙紙繒配芻銀聊將調癡鬼亦復
爭華新願子事篤實浮言掃謔諄窮通付造物得喪理
本均期子如太倉會當發陳陳

崔文學甲攜文見過蕭然有出塵之姿問之則

孫介夫之甥也故復用前韻賦一篇示志舉

象服盛簪珥豈是邢夫人敝衣破冠履可憐范叔貧君

看崔員外晚就觀國賓當年頗赫赫翁媪爭為姻

事見退之

贈崔員外詩

蹭蹬阻風水橫斜挂邊垠青衫映白髮今似梅

子真道存百無害甘守吳市闔自言總角歲慈母為擇

鄰邦人驚似舅矯矯惡不仁詩文非他師家法乃富春

豈非空同秀為國產雋民挺然齊魯生近出姬姜親為

文不在多一頌了伯倫清詩要鍛鍊乃得鉛中銀自我

遷嶺外七見槐火新著書已絕筆一默含千諄蕢桴和
葦籥天節非人均時時自娛嬉豈為俗子陳

畫車詩二首

何人畫此隻輪車便是當年欵器圖上易下難須審細
左提右挈免踈虞

九衢歌舞頌王明誰惻寒泉獨自清賴有千車能散福
化為膏雨滿重城

虔州呂倚承事年八十三讀書作詩不已好妝

古今帖貧甚至食不足

揚雄老無子馮衍終不遇不識孔方兄但有靈照女家
藏古今帖墨色照箱筥饑來據空案一字不堪煮枯腸
五千卷磊落相撐住吟為蝸蝓聲時有島可句為語里
長者德齒敬已古如翁有幾人薄少可時助

王子直去歲送子由北歸往反百舍今又相逢
贛上戲用舊韻作詩留別

米盡無人典破裘送行萬里一鄒游解舟又欲攜君去

歸舍聊須與婦謀
聞道年來丹伏火
不愁老去雪盈頭
剩買山田添鶴口
廟堂新拜富民侯

次韻王晦叔二首

人老家何在
龍眠雨未驚
酒船回太白
穉子候淵明
幸與登仙郭
同依坐嘯成
小樓看月上
劇飲到參橫
鐘鼓江南岸
歸來夢自驚
浮雲世事改
孤月此心明
雨已傾盆落
詩仍翻水成
二江爭送客
木杪看橋橫

次韻江海叔兼呈器之

橫空初不跨鵬鵬但覺胡床步步高

器之言嘗夢飛自覺身與所坐床皆

起空中

一枕晝眠春有夢扁舟夜渡海無濤歸來又見顛

茶陸多病仍逢止酒陶笑說南荒底處所秭今榕葉下
亭臯

寒食與器之游南塔寺寂照堂

城南鐘鼓闌清新端為投荒洗瘴塵總是鏡空堂上客
誰為寂照境中人紅英掃地風驚曉綠葉成陰雨洗春
記取明年作寒食杏花曾與此翁鄰

器之好談禪不喜游山山中笋出戲語器之可

同叅玉版長老作此詩

叢林真百丈法嗣有橫枝

玉版橫枝竹笋也

不怕石頭露來叅

玉版師聊憑柏樹子與問籜龍兒瓦礫猶能說此君那
不知

永和清都觀謝道士童顏鬢髮問其年生於丙
子蓋與予同求此詩

鏡湖勅賜老江東未似西歸玉局翁羈枕未容春夢斷

清都宛在默存中每逢佳境攜兒去試問流年與我同

自笑餘生消底物半篙清漲百灘空

予與劉器之同發
虔州江水忽清漲

丈餘巖石三百里無一見者至永和
器之解舟先去予獨游清都作此詩

贈詩僧道通

雄豪而妙苦而腴祇有琴聰與蜜殊

錢塘僧思聰總角
善琴後捨琴而學

詩復棄詩而學道其詩似皎然而加雄放安州僧仲
殊詩敏捷立成而工妙絕人遠甚殊辟穀常啖蜜 語

帶煙霞從古少

李太白云他人之文如
山無煙霞春無草木

氣含蔬笋到公

無

謂無酸
餽氣也

香村乍喜聞簷蔔古井惟愁斷轆轤為報韓

公莫輕許從今島可是詩奴

張競辰永康所居萬卷堂

君家四壁如相如卷藏天祿吞石渠豈惟鄴侯三萬軸
家有世南行秘書兒童拍手笑何事笑人空腹談經義
未許中郎得異書且共揚雄說竒字清江縈山碧玉環
下有老龍千古間知君好事家有酒化為老人夜扣關
留侯之孫書滿腹玉函寶方何用讀濠梁空復五車多
圯上從來一篇足

劉壯輿長官是是堂

閒燕言仁義是非安可無非非義之屬是是仁之徒非
非近乎訛是是近乎諛當為感麟翁善惡分錙銖抑為
阮嗣宗臧否兩含糊劉君有家學三世道益孤陳古以
刺今紬史行天誅皎皎大明鏡百陋逢一姝鷄立時四
顧何由擾羣狐作堂名是是自說行坦途孜孜稱善人
不善自遠徂願君置座右此語禹所謨

予昔作壺中九華詩其後八年復過湖口則石

已為好事者取去乃和前韻以自解云

江邊陣馬走千峰問訊方知冀北空
尤物已隨清夢斷

劉夢得以九華為造物一尤物

真形猶在畫圖中

道藏有五藏真形圖

歸來晚歲

同元亮却掃何人伴敬通賴有銅盆修石供
仇池玉色

自璵瓏

家有銅盆貯仇池石正綠色有洞水達背予又嘗以怪石供佛印師作怪石供一篇

次韻郭功甫二首

早知臭腐即神奇海北天南總是歸
九萬里風安稅駕

雲鵬今悔不卑飛

可憐倦鳥不知時
空羨騎鯨得所歸
玉局西南天一角
萬人沙苑看孤飛

次韻法芝舉舊詩

春來何處不歸鴻
非復羸牛踏舊蹤
但願老師真似月
誰家甕裏不相逢

次舊韻贈清涼長老

過淮入洛地多塵
舉扇西風欲污人
但怪雲山不改色
豈知江月解分身
安心有道年顏好
遇物無情句法新

送我長蘆舟一葉笑看雪浪滿衣巾

睡起聞米元章到東園送麥門冬飲子

一枕清風直萬錢無人肯買此牕眠
開心暖胃門冬飲
知是東坡手自煎

夢中作寄朱行中

舜不作六器誰知貴璵璠哀哉楚狂士抱璞號空山
相如起晚柱頭壁相與還何如鄭子產有禮國自閑
雖微韓宣子鄙夫亦辭環至今不貪寶凜然照塵寰

答徑山琳長老

與君皆丙子各已三萬日一日一千偈電往那容詰大
患緣有身無身則無疾平生笑羅什神咒真浪出

東坡全集卷二十五

欽定四庫全書薈要卷一萬四千八百五十八

集部

東坡全集卷二十六

宋 蘇軾 撰

詩七十八首

靈上訪道人相遇

花光紅滿攔草色綠無岸不逢青眼人長歌白石澗

送淡公二首

燕本冰雪骨越淡蓮花風五言雙寶刀聯響高飛鴻翰
苑錢舍人詩韻鏗雷公識本不識淡仰詠嗟無窮清韻

生物表朗玉傾壺中常於冷竹坐相語道意沖崧洛興
不薄稽江事難同明日若不來我作黃石翁何以兀其
心為君學虛空

坐重青草公意合滄海濱渺渺獨見水悠悠不聞人鏡
浪洗手淥剡花入心春雖然防外觸眼前遠衣新行當
譯文字慰此吟慙慙

上韓持國

韓氏三虎秉樞極中有一虎似偉節端居隱几學無心

夙駕入朝常正色
犯時獨行太嶮巖
回天不忌真藥石
輦致歸來荷二聖
推排使至有衆力
吾儕小人但飽飯
不有君子何能國
西湖醉卧春水船
如何為人作豐年

送別

鴨頭春水濃如染
水面桃花弄春臉
哀翁送客水邊行
沙襯馬蹄烏帽點
昂頭問客幾時歸
客道秋風落葉飛
繫馬綠楊開口笑
傍山依約見斜暉

琴枕

金少日人卷二十六
卷二十六
清眸作金徽素齒為玉軫響泉竟何用金帶常苦窘瀾
斑漬珠淚宛轉堆雲鬢君若安七絃應彈卓氏引

黃州

南山一尺雪雪盡山蒼然澗谷深自暖梅花應已繁使
君厭騎從車馬留山前行歌招野叟共步青林間長松
得高蔭盤石堪醉眠祇樂聽山鳥攜琴寫幽泉愛之欲
忘返但苦世俗牽歸來始覺遠明月高峯顛

常山贈劉鎡

劉侯年少日駿馬拊便面援弓鴈自落不待白羽貫

古風

精神洞元化白日昇高旻俯仰凌倒景龍行逸如神半
道過紫府弭節聊逡巡金床設寶几璀璨明月珍仙者
二三子眷然骨肉親飲我霞石盃放盃恍如春遂朝玉
虛上冠劍班列真無端拜失儀放棄令自新雲霄難遽
返下土多埃塵淮南守天庖嗟我復何人

遊杭州山

山平村塢迷野寺鐘相答晚陰失林莽

抄一作

落日猶在

塔行招兩社僧共步青山月送客渡石嶠迎客出林樾
幽尋本真性往事聽徐說錢王方壯年此邦事輕俠鄉
人鄙貧賤異類識英傑立石像興王遺址今茂業功勳
三吳定富貴四海甲歸來父老藏崇高畏傾

一作輕

壓詩

人工譏病此欲恣挑抉流傳後世人談笑資口舌是非
今已矣興廢何倉卒持歸問禪翁笑指浮漚沒

遊三遊洞遊洞之日有亭吏乞詩既為留三絕

句於洞之石壁明日至峽州吏又至意若未
足乃復以此授之

一徑遶山翠縈紆云似蛇忽驚溪水急爭看洞門研滑
磴攀秋蔓飛橋踏古槎三扉迎北吹一穴向西斜歎息
煙雲去追思歲月遐唐人昔未到古俗此為家洞暖無
風雪山深富鹿豨相逢衣盡草環坐髻應鬢竈突依巖
黑搏蠱就石窪洪荒無傳記想像在犧媧此事今安有
遺蹤我獨嗟山雨勸留句強為寫槎牙

穆父新涼

家居妻兒號出仕猿鶴怨未能逐什一安敢搏九萬常
恐樗櫟身坐纏冠蓋蔓受恩如負債粗報乃焚券但知
眠牛衣寧免刺虎圈清風來既雨新稻香可飯紫螯應
已肥白酒誰能勸君今崔蔡手政比張趙健三公行可
致一語自先獻幸推江湖心適我魚鳥願

無題

引手攀紅櫻紅櫻落如線仰首看紅日紅日走如箭年

光與時景頃刻互哀變何當血肉身安得常強健人心
苦執迷富貴憂貧賤憂色常在眉歡容不上面吾今頭
半白把鏡非不見惟應花下盃更待他人勸

十一月三日與幾先自竹西來訪慶老不見獨
與君卿供奉蟾知客東閣道話久之惠州追
錄

卷卷長廊走黃葉席簾垂地香煙歇主人待來終不來
火紅銷盡灰如雪

古意

兒曹鞭笞學官府翁憐兒癡旁笑侮翁出坐曹鞭復呵
賢於羣兒能幾何兒曹鞭人以為戲公怒鞭人血流地
等為戲劇誰復先我笑為翁兒更賢

用定國韻贈二十姪震

衡門老苔蘚行柏千兵屯開樽邀落日未對烏鳥言清
風舉吹籟散亂書秩翻傳呼一何急人馬從車奔貧居
少賓客鄰婦窺籬藩牆頭過春酒綠泛田家盆比來伏

青蒲坐捉白獸樽
王猷修潤色亦有簿領煩
朝廷貴
二
陸屢聞天語溫
猶能整筆陣
媿我非韓孫

聞潮陽吳子野出家

子昔少年日氣蓋里閭
俠自言似劇孟叩門知緩急
千金已散盡白首空四壁
烈士歎暮年老驥悲伏櫪
妻孥真敝屣脫棄何足惜
四大猶幻座衣冠矧外物
一朝發無上顧老靈山宅
世事子如何禪心久空寂
世間出世間此道無兩得
故應入枯槁習氣要除拂
丈夫生豈易

趨舍志匪石當為師子吼佛法無南北

補唐文宗柳公權聯句

并引

宋玉對楚王此獨大王之雄風也庶人安得而共之譏
楚王知己而不知人也柳公權小子與文宗聯句有美
而無箴故為足成其篇云

人皆苦炎熱我愛夏日長薰風自南來殿閣生微涼一
為居所移苦樂永相忘願言均此施清陰分四方

食檳榔

月照無枝林夜棟立萬礎眇眇雲間扇蔭此九月暑上
有垂房子下繞絳刺禦風欺紫鳳卵雨暗蒼龍乳裂包
一墮地還以皮自煮北客初未諳勸食俗難阻中虛畏
泄氣始嚼或半吐吸津得微甘著齒隨亦苦面目太嚴
冷滋味絕媚媼誅彭勲可策推轂勇且賈瘴風作堅頑
導利時有補藥儲固可爾果錄詎用許先生失膏梁便
腹委敗鼓日啖過一粒腸胃為所侮蟄雷殷臍腎藜藿
腐亭午書短看膏盡鉦漏厯厯數老眼怕少睡竟使赤

皆努渴思梅林噉饑念黃獨舉奈何農經中收此因羈
旅牛舌不餉人一斛肯多與乃知見本偏但可酬惡語

古離別送蘇伯固

三度別君來此別真遲暮白盡老髭鬚明日淮南去酒
罷月隨人淚濕花如霧後夜逐君還夢遶湖邊

一作江南路

次韻魯直書伯時畫王摩詰

前身陶彭澤後身韋蘇州欲覓王右丞還向五字求詩
人與畫手蘭菊芳春秋又恐兩皆是分身來入流

雷州八首

白髮坐鉤黨南遷瀕海州
灌園以糊口身自雜蒼頭
籬落秋暑中碧花蔓牽牛
誰知把鋤人舊日東陵侯

荔子無幾何黃柑遽如許
遷臣不惜日恣意移寒暑
層巢俯雲木信美非吾土
草芳自有時鷓鴣何闕汝

下居近流水小巢依嶺岑
終日數椽間但聞鳥遺音
爐香入幽夢海月明孤斟
鷓鴣一枝足所恨非故林

培塿無松柏駕言此焉游
讀書與意會却掃可忘憂
尺

蠖以時屈其伸亦非求得歸良不惡未歸且淹留

粵嶺風俗殊有疾時勿藥束帶趨房祀用史巫紛若絃
歌薦繭栗奴至洽觴酌呻吟殊未央更把雞骨灼

粵女市無常所至輒成區一日三四遷處處售鰕魚青
羣脚不襪臭味猿與狙孰云風土惡白洲生綠珠

海康臘己酉不論冬孟仲殺牛搗鼓祭城郭為傾動雖
非堯頌厯自我先人用苦笑荆楚人嘉平臘雲夢

舊時日南郡野女出成群此去尚應遠東風已如雲蚩

祇託絲布相就通殷懃可憐秋胡子不遇卓文君

妬佳月

狂雲妬佳月怒飛千里黑佳月了不嗔曾何汙潔白爰
有謫仙人舉酒為三客今夕偶不見沈瀾念風伯毋煩
風伯來彼也易滅沒支頤少待之寒空淨無迹粲粲黃
金盤獨照一天碧玉繩慘無輝玉露洗秋色浩瀚玻璃
瑛和光入胸臆使我能永延約君為莫逆

追和沈遼頃贈南華詩

善哉彼上人了知明鏡臺歡然不我厭肯致遠公材莞爾無心雲胡為出岫來一堂安寂滅卒歲局蒼苔

夢雪

殘杯失春溫破被生夜悄開門千山白俯仰同一照雖時出圭角固自絕瑕竅兒童勿驚怪調汝得一笑

雪林硯屏率魯直同賦

西山無時春巉巖鎖頑陰分明倚天壁點綴無風林物固為人出興誰於此深窮竒真自蠹詩句且娛心

南屏謙師妙於茶事自云得之於心應之於手
非可以言傳學到者十月二十七日聞軾遊
壽星寺遠來設茶作此詩贈之

道人曉出南屏山來試點茶三昧手忽驚午琰兔毫斑
打作春甕鵝兒酒天台乳花世不見玉川風腋今安有
東坡有意續茶經會使老謙名不朽

申王畫馬圖

天寶諸王愛名馬千金爭致華軒下當時不獨玉花驄

飛電流雲絕瀟灑兩坊歧薛寧與申憑陵內廐多清新
肉駿汗血盡龍種紫袍玉帶真人驪山射獵包原隰
御前急詔穿圍入揚鞭一蹙破霜蹄萬騎如風不能及
鴈飛兔走驚弦開翠華按轡從天回五家錦繡變一作遍

山谷百里烏珥遺纖埃青騾蜀棧兩一作西超忽高準濃

娥散荆棘回首追風趨日飛一作首茫連天鳥自飛五陵佳氣春

蕭瑟

奉和成伯大雨中會客解嘲

樂事難并真實語坐排用意多乖誤興來取次或成懽
瓦鈎却勝黃金注我生禍患久不擇肯為一時風雨阻
天公變化豈有常明月行看照歸路

和公濟飲湖上

昨夜醉歸還獨寢曉來宿雨鳴孤枕扁舟小棹截湖來
正見青山駁雲錦須知老人興不淺莫學公榮不共飲
與君歌鼓樂豐年喚收千夫食陳廩

贈僧

道人自嫌三世將棄家十年今始壯玉骨猶含富貴餘
漆瞳已照人天上年相見古長干衆中矯矯如翔鸞
今年過我江西寺病瘦已作霜松寒朱顏不辨供歲月
風中蒿火湯中雪好問君家黃面翁乞得摩尼照生滅
莫學王郎與支遁臂鷹走馬憐神駿還君畫圖君自收
不如木人騎土牛

周教授索枸杞因以詩贈錄呈廣倅蕭大夫

鄴侯藏書手不觸嗟我嗜書終日讀短檠照字細如毛

怪底昏花懸兩目扶衰賴有王母杖名字於今掛仙錄
荒城古塹草露寒碧葉叢低紅菽粟春根夏苗秋著子
盡付天隨恥充腹蘭傷桂折緣有用爾獨何損丹其族
贈君慎勿比薏苡採之終日不盈掬外澤中乾非爾儔
斂藏更借秋陽曝雞壘枯梗一稱帝堇也雖尊等臣僕
時復論功不汝遺異時謹事東籬菊

次韻董夷仲茶磨

前人初用茗飲時煮之無問葉與骨寢窮厥味白始用

復計其初碾方出計盡功極至於磨信哉智者能創物
破槽折杵向牆角亦其遭遇有伸屈歲久講求知處所
佳者出自衡山窟巴蜀石工強鑿鑿理疎性軟良可吐
予家江陵遠莫致塵土何人為披拂

送公為遊淮南

負米萬里緣其親運甕無度憂其身讀書莫學流麥士
挾策莫比亡羊人迺翁辛苦到白首汝今強勉當青春
昔時管鮑以君霸此兩士賈寧非貧

謝蘇自之惠酒

高士例須憐麴蘖此語嘗聞退之說我今有說殆不然
麴蘖未必高士憐醉者墜車莊生言全酒未若全於天
達人本自不虧缺何暇更求全處全景山沈迷阮籍傲
畢卓盜竊劉伶顛貪狂嗜怪無足取世俗喜異矜其賢
杜陵詩客尤可笑羅列八子叅羣仙流涎露頂置不說
為問底處能逃禪我今不飲非不飲心月皎皎長孤圓
有時客至亦為酌琴雖未去聊忘絃吾宗先生有深意

百里雙罌遠將寄且言不飲固亦高舉世皆同吾獨異
不如同異兩俱冥得鹿亡羊等嬉戲決須飲此勿復辭
何用區區較醒醉

西山戲題武昌王居士

并引

予往在武昌西山九曲亭上有題一句玄鴻橫號黃榭
峴九曲亭即吳王峴山一山皆榭葉其旁即元結陂湖
也荷花極盛因為對云皓鶴下浴紅荷湖坐客皆笑同
請賦此詩

江干高居堅闕扃捷耕躬稼角掛經篙竿繫舸菰艾隔
笳鼓過軍雞狗驚解襟顧景各箕踞擊劍麇歌幾舉觥
荆筭供膾愧攪聒乾鍋更戛甘瓜羹

戲和正甫一字韻

故居劍閣隔錦官柑果薑蕨交荆管竒孤甘掛汲古綆
僥覲敢揭鉤金竿已歸耕稼供藁桔公貴幹蠱高巾冠
改更句格各蹇吃姑因狡獪加間闕

王方平謂麻姑云
姑固少年吾老矣

不復作此狡
增變化也

池上二首

小池新鑿會天雨一部鼓吹從何來有蟾正碧亂草色
時洄出沒東南隈井幹跳梁亦足樂洞庭魚龍何有哉
能歌德聲莫入月清池與爾俱忘回

不作太白夢日邊還同樂天賦池上池上新年有荷葉
細雨魚兒噉輕浪男兒學易不應舉幽人一友吾得尚
此池便可當長江欲榜茅齋來蕩漾

贈仲素寺丞致仕歸隱潛山

潛山隱君七十四紺瞳綠髮方謝事腹中靈液變丹砂
江上幽居連福地彭城為我駐三日明月滿舟同一醉
丹書細字口傳訣顧我沈迷真棄耳年來四十髮蒼蒼
始欲求方救憔悴他年若訪潛山居慎勿逃人改名字

魯直以詩餽雙井茶次韻為謝

江夏無雙種竒茗汝陰六一誇新書磨成不敢付僮僕
自看雪湯生幾珠列仙之儒瘠不腴只有病渴同相如
明年我欲東南去畫舫何妨宿太湖

歸田錄草茶以雙井為第一畫舫宿

太湖北渚
貢茶故事

揚州以土物寄少游

鮮鯽經年秘醺醖團臍紫蟹脂填腹後春萼茁活如酥
先社薑芽肥勝肉烏子纍纍何足道點綴盤餐亦時欲
淮南風俗事瓶罌方法相傳竟留蓄且同千里寄鵝毛
何用孜孜飲麋鹿

贈曇秀

白雲出山初無心棲鳥何必戀山林道人偶愛山水故

縱步不知湖嶺深空巖已禮百千相曹溪更欲瞻道像
要知水味孰冷暖始信夢時非幻妄袖中忽出貝葉書
中有璧月綴星珠人間勝絕略已遍匡廬南嶺并西湖
西湖北望三千里大堤冉冉橫秋水誦師佳句說南屏
瘴雲應逐秋風靡胡為只作十日歡杖策復尋歸路難
留師筍蕨不足道悵望荔子何時丹

再過泗上二首

眼明初見淮南樹十客相逢九吳語旅程已付夜帆風

客睡不妨背船雨黃柑紫蟹見江海紅稻白魚飽兒女
慇懃買酒謝船師千里勞君勤轉櫓

繫舟淮北雨折軸繫舟淮南風斷橋客行有期日月疾
歲事欲晚霜雪驕山根浪頭作雷吼縮手敢試舟師篙
不用燃犀照幽怪要須拔劍斬長蛟

贈李兕彥威秀才

魏王大瓠實五石種成濩落將安適可憐公子持十牛
海上三年竟何得先生少負不羈才從軍數到單于臺

天山直欲三箭取白衣將軍何人哉夜逢怪石曾飲羽

戲中戟枝何足數誓將馬革裹屍還肯學班超苦兒女
封侯衛霍知幾許老矣先生困羈旅酒酣聊復說平生
結襪猶堪一再鼓棄書捐劍學萬人紈袴儒冠皆誤身
窮途正似不龜手與世羞為西子顰如今惟有談天口
雲夢胸中吞八九世間萬事寄黃梁且與先生說烏有

次韻謝子高讀淵明傳

枯木嵌空微黠淡古器雖在無古絃袖中正有南風手

誰為聽之誰為傳風流豈落正始後甲子不數義熙前一山黃菊平生事無酒令人意缺然

龐公

襄陽龐公少檢束白髮不髡亦不俗世所奔趨我獨棄
我已之餘彼不足鹿門有月樹下行虎溪無風舟上宿
不識當時捕魚客但愛長康畫金粟杜口如今不復言
龐公為人不由局東西有人問老翁為道明燈照華屋
五言七言正兒戲三行五行亦偶爾我性不飲只解醉

正如春風弄羣卉四十年來同幻事老去何須別愚智
古人不仕亦不滅我今不作亦不止寄語悠悠世上人
浪生浪死一埃塵洗墨無池筆無象聊爾作戲悅吾神

送呂行甫司門倅河陽

結交不在久傾蓋如平生識子今幾日送別亦有情子
生公相家高義久崢嶸天才既超詣世故亦屢更譬如
追風驥豈免羈與纓念我山中人久與麋鹿并誤出掛
世網舉動俗所驚歸田雖未果已覺去就輕河陽豈云

遠出處恐異程便當從此別有酒無徒傾

食雉

雄雉曳脩尾驚飛向日斜空中紛格鬪綠羽落如花喧
呼勇不顧投網復誰嗟百錢得一雙新味時所佳烹煎
雜雞鶩爪距漫搓牙誰知化為蜃海上落飛鷗

雙鳧觀

在崇
縣

王喬古仙子時出觀人寰常為漢郎吏厭世去無還雙
鳧偶為戲聊以驚世頑不然神仙迹羅網安能攀紛紛

塵埃中銅印紆青綸安知無隱者竊笑彼愚奸

郭綸

綸本河西弓箭手屢戰有功不賞自聚州都監官滿貧不能歸今權嘉州監稅

河西猛士無人識日暮津亭閱過船
路人但覺驄馬瘦不知鐵槩大如椽
因言西方久不戰截髮願作萬騎先
我當憑軾與寓目看君飛矢射蠻羶

初發嘉州

朝發鼓闐闐西風獵畫舫故鄉飄已遠
往事浩無邊錦水細不見蠻江清更鮮
奔騰過佛脚曠蕩造平川野市

有禪客釣臺尋暮烟相期定先到久立水潺潺

是日期
鄉僧家

一會別釣
魚臺下

捷為王氏書樓

樹林幽翠滿山谷樓觀突兀起江濱云是昔人藏書處
磊落萬卷今生塵江邊日出紅霧散綺窻畫閣青氛氲
山猿悲嘯谷泉響野鳥嘒夏巘花春借問主人今何在
被甲遠戍長苦辛先登搏戰事斬級區區何者為三墳
書生古亦有戰陣葛巾羽扇揮三軍古人不見悲世俗

回首蒼山空白雲

過宜賓見夷中亂山

江寒晴不知遠見山上日朦朧含高峰晃蕩射峭壁橫
雲忽飄散翠樹紛厯厯行人挹孤光飛鳥投遠碧蠻荒
誰復愛穠秀安可適豈無避世士高隱鍊精魄誰能從
之遊路有豺虎迹

夜泊牛口

日落江霧生繫舟宿牛口居民偶相聚三四依古柳負

薪出深谷見客喜且售煮蔬為夜餐安識肉與酒朔風
吹茅屋破壁見星斗兒女自呻憂亦足樂且久人生本
無事苦為世味誘富貴耀吾前貧賤獨難守誰知深山
子甘與麋鹿友置身落蠻荒生意不自陋今子獨何者
汲汲強奔走

牛口見月

掩窻寂已睡月脚垂孤光披衣起周覽飛露洒我裳山
川同一色浩若涉大荒幽懷耿不寐四顧獨彷徨忽憶

丙申年京邑大雨霧蔡河中夜決橫浸國南方車馬無
復見紛紛操楫郎新秋忽已晴九陌尚汪洋龍津觀夜
市燈火亦煌煌新月皎如晝踈星弄寒芒不知京國喧
是謂江湖鄉今來牛口渚見月重淒涼郎思舊遊處滿
陌沙塵黃

舟中聽大人彈琴

彈琴江浦夜漏永斂衽竊聽獨激昂風松瀑布已清絕
更愛玉珮聲琅璫自從鄭衛亂雅樂古器殘缺世已忘

千年寥落獨琴在有如老仙不死閱興亡世人不容獨
反古強以新曲求鏗鏘微音淡弄忽變轉數聲浮脆如
笙簧無情枯木今尚爾何況古意墮渺茫江空月出人
響絕夜闌更請彈文王

泊南牛口期任遵聖長官到晚不及見復來
江上有微徑深榛煙雨埋崎嶇欲取別不見又重來下
馬未及語固已慰長懷江湖涉浩渺安得與之偕

江上看山

船上看山如走馬倏忽過去數百羣前山槎牙忽變態
後嶺雜遝如驚奔仰看微逕斜繚繞上有行人高縹緲
舟中舉手欲與言孤帆南去如飛鳥

留題仙都觀

山前江水流浩浩山上蒼蒼松柏老舟中行客去紛紛
古今換易如秋草空山樓觀何崢嶸真人王遠陰長生
飛符御氣朝百靈悟道不復誦黃庭龍車虎駕來下迎
去如旋風搏紫清真人厭世不回顧世間生死如朝暮

學仙度世豈無人餐霞絕粒長辛苦安得獨從逍遙君
冷然乘風駕浮雲超世無有我獨行

屈原塔

在忠州原不當有塔於此
意者後人追思故為作之

楚人悲屈原千歲意未歇精魂飄何處父老空哽咽至
今滄江上投飯救饑渴遺風成競渡猿叫楚山裂屈原
古壯士就死意甚烈世俗安得知眷眷不忍決南賓舊
屬楚山上有遺塔應是奉佛人恐子就淪滅此事雖無
憑此意固已切古人誰不死何必較考折名聲實無窮

富貴亦暫熱大夫知此理所以持死節

西山詩和者三十餘人再次前韻為謝

朱顏發過如春醅胸中黎棗初未栽丹砂未易掃白髮
赤松却欲參黃梅寒溪本自遠公社白蓮翠竹依崔嵬
當時石泉照金像神光夜發如五臺飲泉鑒面得真意
坐視萬物皆浮埃欲收暮景返田里遠溯江水窮離堆
還朝豈獨羞老病自歎才盡傾空罍諸公渠渠若夏屋
吞吐風月清隅隈我如廢井久不食古甃缺落生陰苔

數詩往復相感發及新除舊寒光開遙知二月春江闊
雪浪倒卷雲峯摧石中無聲水亦靜云何解轉空山雷
欲就諸公評此句一作語要識憂喜何從來願求南宗一
勺水往與屈賈湔餘哀

新灘

扁舟轉山曲未至已先驚白浪橫江起槎牙似雪坪
番從高來一一投澗坑大魚不能上暴鬣一作腮灘下橫
小魚散復合澗瀾如遭烹鷓鴣不敢下飛過兩翅輕白

鷺誇瘦捷，踵脚還欹傾。區區舟上人，薄技安敢呈。只應灘頭廟，賴此牛酒盈。

新灘阻風

北風吹寒江，來自兩山口。初聞似搖扇，漸覺平沙走。飛雲滿崑谷，舞電穿窻牖。灘下三日留，識盡灘山一作前叟。孤舟倦鷓鴣，軋短纜。困牽揉，嘗聞不終朝。今此何其久，只應留遠人。此意固亦厚，吾今幸無事。閉戶為飲酒。

昭君村

昭君本楚人艷色照江水楚人不敢娶謂是漢妃一作家
子誰知去鄉國萬里為胡鬼人言生女作門楣昭君當
時憂色哀古來人事盡如此反覆縱橫安可知

黃牛廟

江邊石壁高無路上有黃牛不服箱廟前行客拜且舞
擊鼓吹簫屠白羊山下耕牛苦硤确兩角磨崖四蹄濕
青芻半束長苦饑仰看黃牛安可及

蝦蟆培

墓背似覆孟墓頤如偃月謂是月中墓開口吐月液根
源來甚遠百尺蒼崖裂當時龍破山此水隨龍出入江
江水濁猶作深碧色稟受苦潔清獨與凡水隔豈惟煮
茶好釀酒應無敵

留題峽州甘泉寺

姜詩
故居

輕舟橫江來弔古悲純孝逶迤尋遠迹婉孌見遺貌清
泉不可挹涸盡空石窖古人飄何之唯有風竹鬧行行
玩村落戶戶懸網罩民風坦和平開戶夜無鈔叢林富

笋茹平野絕虎豹嗟哉此樂鄉無乃姜子教

寄題清溪寺

在峽州鬼谷子之故居

口舌安足恃韓非死說難自知不可用鬼谷乃貞奸遺
書今未亡小數不足觀秦儀固新學見利不知患嗟時
無桓文使彼二子顛死敗無足怪夫子固使然君看巧
更窮不若愚自安遺宮若有神領首然吾言

荆門惠泉


泉源從高來走下隨石脈紛紛白沫亂隱隱蒼崖坼縈

回成曲沼清澈見肝膈
瀉瀉為長溪奔駛蕩蛙蠃初開
不容挽漸去已如帛傳聞此山中神物懶
一作懶遭謫不能致雷雨
灑灑吐寒碧遂令山前人千古灌稻麥

東坡全集卷二十六

謹案卷二十五第十一頁前三行南詔有西珥河
刊本珥訛洄又四行河形如月抱珥刊本抱訛
耳並據施本改

第十五頁前八行要三二別四三壺刊本三二二
字缺又四訛方並據施本增改



總校官庶吉士臣張能照
校對官庶吉士臣陳文樞
騰錄監生臣沈元錡